

Muhé di Bida Morto

"For di bentana di mi kas mi tabata wak, dor di yalusí. Mi a ripará entre e hobennan un yònkuman ku falta komprendementu ku tabata pasa den e kaya pegá ku e skina unda e muhé ta biba, skuritu, ora ku nochi ta sera, mei anochi i den skuridat. Un muhé ta sali kontr'é bistí manera muhé di bida. Asina e ta gara e hoben i ta sunch'é, i ku kara seku e ta bis'é: 'Bin, laga nos hasi nos mes burachi di amor te mainta; laga nos gosa di amor.' Ku su palabranan dushi e ta gañ'é; ku labiamentu, e ta sedusié. Mesora e hoben ta bai su tras."

E relato aki, skirbí kasi 3.000 aña pasá (Proverbionan 7:7-23), ta mes relevante awe ku e tabata tempu ku el a wòrdu skirbí. Naturalesa humano no a kambia i e peliger físiko ku prostitushon ta presentá pa e komunidad no a kambia.

Na Boneiru tin varios klase di prostituta. Tin 10-15 stranhera ku pasport hulandes registrá komo prostitutanen residente. Nan ta praktiká nan inmoralidat prinsipalmente na dos bar di mal reputashon. Maske e muhénan aki ta kontrolá pa malesanan venérikiko kada luna, nan por ta portadó di e viro ku ta kousa AIDS i pa varios luna por pega nan klientenan ku e malesa mortal aki sin ku dòkter sa.

Un otro klase di prostituta ta e venezolanenan i kolombianenan ku ta haña visa di 7 dia pa praktiká nan trabou baho na nos isla. Segun e informashon ku nos por a haña, mas òf menos 70 di e muhénan aki ta frekuentá nos pida baranka. Na nan turno nan ta regresá na nos isla, huntu ku algun kara nobo, i ta hospedá na un "penshon" konosí pa prostitushon.

E muhénan aki ta presentá un menasa mas serio pa nos komunidad. Dòkter mester kùr nan promé ku nan por "traha." Ma si nan yega Boneiru na komienso di wikènt, nan por praktiká nan piká trankil pa tres anochi sin kontrol mediko! Ta klaro ku e muhénan aki por importá diferente enfermidad venérikiko horibel. (Por pasa ku un muhé ku ta HIV positivo ta bin traha na nos isla.) Ora dòkter porfin ta eksaminá nan, e no ta hasi tèst pa sierto malesa venérikiko, por ehèmpel klamidia. Komo ta dura 4 siman pa haña resultado di e tèst ei, lo e no sa si e prostituta ta infektá ku klamidia te tres siman despues ku el a bandoná nos isla. Pues, dòkter ta kùr e pa traha i kontagiá su klientenan ku malesanan peligroso.

Ku nos leinan eksistente nos komunidad ta sumamente vulnerabel! Ta inkreibel ku hende hòmber ta despuesto di hasi uso di nan servisionan tòg! Ta inkreibel ku nos ta despuesto pa sigui tolerá e situashon aki! Ta inkreibel ku gobierno no ta pone un paro na e inmoralidat peligroso ei! Ya kaba nan a limitá nan visa for di e 3 luna normal pa 7 dia. Ta na bienestar di salubridat di nos komunidad si nos gobernantenan lo kambia e 7 pa 0 dia!

E di tres klase di prostituta na nos isla kisas ta esun mas peligroso. E grupo aki ta formá di un kantidat deskonosí di suidadero i stranhero ku ta praktiká prostitushon sin registrá. Pa un òf otro motibu e muhénan aki ta dispuesto pa bende nan kurpa pa nan por haña algu en kambio. Kisas ta un señora òf muhé soltera ku simplemente ta haña ku e tin mester di mas sèn. Kisas ta un hobensita drogadikto ku ta bende su kurpa pa sostené su bisio. Den kada kaso e ta bende su poseshon di mas balioso (su puresa, su birginidat, i moralidat) djis pa algun biyèt. Asta shèn mion florin no por kompensá pa lokual e ta pèrdè dor di un solo akto immoral.

E muhénan aki ta un menasa serio pa salubridat di nos komunidad. Nan no ta kontrolá pa dòkter. Komo ku nan tin múltipel partner seksual, nan por ta infektá ku tur klase di enfermidad venérikiko. Ta bon pa realisá ku un persona por kontagiá 5 malesa venérikiko dor di solamente un enkuentro seksual.

Kon Beibel ta kaba e storia ku nos a kuminsá ku né? "Mesora e hoben ta bai su tras, manera un buey ta bai pa wòrdu matá, manera un bobo mará na kadena, te ora ku un flecha bora su higrá; manera un para ta kore bai den trampa, asina e no sa ku esaki lo kosta su bida" (Proverbionan 7:22-23)

E Skritura aki ta deskribí e preis teribel ku e "kliente" di un prostitute lo mester paga tardi òf tempran. En bista di e preis karisimo di relashon seksual ku un "muhé di bida," segun Beibel lo ta mas apropiá pa yam'é un "muhé di morto."